

**總題：學為人師 行為世範**

**別題：善財童子參學報告(12)**

◎海雲比丘二住章

## 一、依教趣求

- 1.海雲比丘治地住，謂常隨空心，淨治八萬四千法門，清淨潔白，練治心地，故名治地。
- 2.善財聞善知識（吉祥雲比丘）教，一心正念。隨順智慧光明。通達甚深解脫。憶持自在三昧。敬奉清淨教海。觀察諸佛威德。欣樂諸佛住處。解了諸佛軌則。思念諸佛出現。趣入諸佛法界。安住諸佛境界。
- 3.漸次南行，向海門國。疏云，表觀心海，為治心地深廣門故。海為法門，普眼法雲，深廣覆潤諸眾生故。表治地中觀察眾生，生起深廣大悲故。

## 二、見敬咨問

- 1.詣海雲比丘所，頂禮雙足，繞無數匝，於前合掌。
- 2.白言：聖者，我已先發阿耨多羅三藐三菩提心。欲入甚深最上智海。
- 3.未知菩薩云何能具菩薩行，長養菩提種。

云何能捨凡夫家，生於如來家。

云何能度生死海，入佛智慧海。

云何能離凡愚地，入佛最勝地。

云何能斷生死流，入佛淨行流。

云何能壞生死輪，成就大願輪。

云何能滅魔境界，顯示佛境界。

云何能竭愛欲海，增長大悲海。

云何能閉三途八難門，開人天涅槃門。

云何能出三有繫縛城，入種智解脫城。

云何能棄捨一切珍玩資具，饒益攝受一切眾生。

4.唯願慈哀，為我宣說。

### 三、稱讚授法

1.善男子，若諸眾生，未曾修種深固善根，則不能發阿耨多羅三藐三菩提心。

2.菩薩要得平等無礙善根。要得真實巧方便、正道、三昧、光明。要得積集功德，廣大福聚，要得增長白法。

3.要能供事真善知識，諮問法要無疲厭。要捨慳吝無所藏積，於身命財無愛著。要離憍慢，心無高下，安住不動。要恆觀察如來境界，欣求修習至究竟。要恆利益安樂一切諸眾生。如是乃能發菩提心。

4.發菩提心者：

(1)拔濟苦惱諸眾生故發大悲心；大悲甚深無能測故。

(2)平等福祐諸眾生故發大慈心；種種外道攝令正信。

(3)除滅眾生諸苦蘊故發安樂心；始於世樂，種種與故。

(4)為息眾生不善心故發饒益心；惡行眾生令住善行。

(5)救護怖畏諸眾生故發哀愍心；悉包納故。

(6)捨離執著障礙法故，發無著心。

(7)普遍法界諸佛剎故，發廣大心。

(8)等虛空界無不往故，發無邊心。

(9)見一切佛妙色身故，發無垢心。

(10)觀三世法智無盡故，發清淨心。

(11)普入一切智智海故，發大智心。

發如是等種種心故，是名菩薩發菩提心。

5.見佛一段文中，所有莊嚴，皆從如來過去積集出世廣大善根所生。令諸菩薩信願成滿。如來相好具足。

6.憶念彼佛往修本行，菩提自在，法雷震吼，普門示現，種種莊嚴不可思議，普遍饒益咸令成熟。

7.善男子，我從彼佛得聞於此普眼法門，受持讀誦憶念思惟。開演顯示增廣。諸眾生等，為聽法故，而來我所，我悉為其次第開演，分別解說，咸令歡喜，心生愛樂，深信趣入，悟解成就。

8.普眼者，略有五義：(1)詮普法。(2)普詮諸法。(3)得此法者，一法之中見一切故。(4)唯是十眼之所見故。(5)非唯十眼圓明方見，能所不異，方能見故。

9.是義云何？謂諸緣發見，緣各為根。因沒果中，緣皆號眼。故全色為眼，恆見色而非緣，全眼為色，恆稱見而非我。非我離於情識，非緣遠於尋求。收萬象於目前，全十方於眼際。是以緣義無盡，雖見見而不窮。物性叵思，應法法

而難準。故法普即眼普，義通乃見通。體之而寂寂，照之乃重重。斯眼所見，為普眼法門。

10. 普眼之用，謂無行不開，無境不照，無德不具，無用不周，故為普耳。

#### 四、謙已推勝

1. 善男子，我唯知此普眼法門。如諸菩薩摩訶薩深入一切菩薩行海，隨其願力皆清淨故。深入一切廣大願海，盡一切劫住世間故。深入一切諸眾生海，隨其心行普饒益故。深入一切眾生心海，出生無礙十力智故。深入一切眾生根海，隨時調伏令成熟故。深入一切同異剎海，為滿本願悉嚴淨故。深入一切無盡佛海，常願承事興供養故。深入一切正覺法海，能以智慧咸悟入故。深入一切佛功德海，於真實道具足修故。深入一切諸言辭海，遍一切剎轉法輪故。而我云何能知能說彼功德行。

2. 善男子，從此南行六十由旬。楞伽道邊，有一聚落，名為海岸。彼有比丘，名曰妙住。汝詣彼問，菩薩云何令菩薩行速得清淨。

[淨空法師專集網站\(簡\)製作](#)